

**TUSI TA'IALA POO LE  
FUAFUAGA TATAU  
MO LE VA'AIA LELEI O I'A MA FIGOTA  
O LE AFIO'AGA  
O**



**SAUNIA:**

Pule mamalu a Alii ma Faipule ma tagatanu'u o le afio'aga faatasi ma le lagolagosua a le Vaega o Faigafaiva a le Matagaluega o Faatoaga ma Faigafaiva.

**PASIA ALOAIA: *ASO 24 Novema, 2006***

# **FA'ALUPEGA O LE AFIO'AGA**

Afio le Aiga o Mavaega,

Lau Fetalaiga Lealuga

Ma le

Falefa o Satua

<b>TUSI TA'IALA POO LE FUAFUAGA TATAU.....</b>	<b>1</b>
<b>MO LE VA'AIA LELEI O I'A MA FIGOTA.....</b>	<b>1</b>
1 Fa'atomuaga.....	4
2 Autu.....	4
2 Faamatalaga e uiga i le Afio'aga. ....	5
3 Ituaiga Faigafaiva ta'atele.....	7
4 Tulafono faa-le-nuu e fesootai ma le siosiomaga o le gataifale o Sataua. ....	7
5 Tapenaga o lenei Fuafuaga Tatau .....	7
5.1 Feiloaiga muamua ma le uluai fono ma le afio'aga.....	8
5.2 Faatalatalanoaga ma le Pule Mamalu a Alii & Faipule ma le Komiti a Tina & Tamaitai. ....	9
5.3 Komiti Faufautua mo le vaaia lelei o i'a ma figota (KFVL) .....	10
6 Pasiaina o le Fuafuaga Tatau mo le Vaaia Lelei o I'a ma Figota. ....	10
6.1 Fuafuaga Tatau mo le Vaaia Lelei o i'a ma figota ma le tauaofiaga o le Fono Mulimuli. ....	10
7 Fuafuaga Faataatitia.....	10
7.1 "Faamalosi Tulafono faale nuu e faasaina ai faigafaiva le talafeagai e pei o fanai'a ava niu kini ma vailaau oona".....	11
7.2 Ia faasaina faigafaiva mai isi Afio'aga. ....	12
7.3 Ia faasaina ona toe fagotaina mai i'a ma figota laiti. ....	12
7.4 Ia faasaina lama moliuila .....	13
7.5 Ia faasaina ona toe Lafoa'i lapisi e pei o uamea, atigi apa pepa iila ma isi ituaiga i le sami ma le matafaga.....	14
7.6 Ogasami Faasaoina .....	14
7.7 Ia iloilo ina tulaga talafeagai o le faasaoina o se vaega o le gataifale ole afio'aga	15
7.8 Ia iloilo ina tulaga talafeagai o le Gataifale mo le Tufaina atu ma le Faatoagaina o figota ma i'a. ....	16
7.9 Ia fa'aaogaina le Mana o Talosaga! .....	17
7.10 Talosaga: .....	18
7.11 Maliliega: .....	18
7.12 Toe iloilo ina o lenei Fuafuaga Tatau .....	18
7.13 Upu Mulimuli: .....	19
8 Faamatalaga 1 - Faamatalaga e uiga i le afio'aga o SATAUA.....	20
9 Faamatalaga 2: Ituaiga Faigafaiva e fa'atino ina i aso uma.....	21
10 Fa'amatalaga 3: I'a ma Figota .....	22
11 Fa'amatalaga 4: Tulafono a le Afio'aga i le puipuiga o le gataifale.....	23
12 Fa'amatalaga 5: Fa'amatalaga ma fa'amaumauga sa ao ina i taimi o fa'atalatalanoaga i vaega.....	24
13 Fa'amatalaga 6: Sui o le afio'aga sa auai i faatalatalanoaga .....	25

# 1 Fa'atomuaga

O faigafaiva i Samoa e taua tele aua o se tasi lea o auala e maua ai le fofoga taumafa aemaise lava i nu'u ma afio'aga i tua. I le tele o afio'aga, latou te le o fa'atauaina le va'aia lelei o le tamaoiga ma le si'osi'omaga o le gataifale. O le aumaia ma le fa'aaogaina o ituaiga faigafaiva faa-onapo nei e i ai mea manava, upega/tili mataninii, ma vaila'au 'oona e fa'amata faigofie ai ma tele i'a maua ae o lo o fa'atama'ia ai le si'osi'omaga o le gataifale ma ona tamaoiga. O le fa'atinoina foi o atina'e i luga o le gataifale ua fa'alegaina ai le tele o nofoaga ma le miliona o meaola o loo nonofo ma tautuuufua ai. Ina ia fa'asaoina mai lea tulaga, ua fa'atuina ai e le Vaega o Faigafaiva o le Matagaluega o Faatoaga ma Faigafaiva se Polokalame mo le Pulega o le Si'osi'omaga o le Gataifale, ma le Vaa'ia lelei o i'a ma figota, ina ia fesoasoani i le fausiaina o se Pulega faa-faigafaiva i nu'u ma afio'aga e fa'asao, pulea ma fuafua tatau le faaogaina o le tamaoiga o le gataifale o Samoa.



*O se va'aiga matagofie lenei i le gataifale o le afio'aga o Sataua*

O lenei fuafuaga tatau mo le va'aia ma le tausia lelei o i'a ma figota sa saunia e le Pule mamalu a Alii ma Faipule ma tagatanu'u o le afio'aga o Sataua faatasi ma le lagolagosua a le Vaega o Faigafaiva.

## 2 Autu.

O le autu sa fa'atalatalanoaina ma malilie autasi ai le Pule mamalu a Alii ma Faipule faatasi ma le Komiti a Tina o le Afio'aga o Sataua i taimi o faatalatalanoaga o le ;


***"Puipuiga o le Siosiomaga o le Gataifale ma le toe faatupulaia o i'a ma figota mo tupulaga ole lumanai"***



## 2 Faamatalaga e uiga i le Afio'aga.

O le Afio'aga o Sataua e i le itu i matu i sisifo o le motu tele o Salafai ma o lona faitauaofai e tusa ma le 994 aofia ai Matai, Tina ma Tamaitai, Aumaga ma alo ma fanau. E le o aofia ai i latou ua faimalaga atu i atunuu i fafo ma aumau ai.

E tolu ni tapuaiga i totonu o le Afio'aga, o le EFKS, KATOLIKO ma le METOTISI faatasi ai ma le Aoga Tulagalua o loo agai iai alo ma fanau a le afio'aga ma nisi i le Aoga Fa'a-Itumalo a le ITU-ASAU .



O le afio'aga foi lenei o loo faapea ona iai ma le falema'i faa-itumalo mo gasegase uma e agai atu iai. O se tulaga lelei lea mo le faa-faigofieina ma le taugofie ona faafesootai fomai mo gasegase.



O Sataua e iai lona aau e mai lava i le itu i matu seia paia le itu i sisifo i le mamao pe a ma le 500 mita mai le matafaga. O le vaega pito loloto o le aloalo e tusa ma le 7 futu i taimi e sua ai le tai ao nisi pito e mago atoa pe a oo ina pe le tai.



***Ata: O se vaaiga i le gataifale o le afio'aga ma nisi o taumafaiga mo le puipuiga o le lauina o le oneone.***

O lenei Afio'aga e mamalu tele ona pulega aua e pulea lava e le pule mamalu a Alii ma Faipule. O le aumaga e lava saunia i taimi uma aua le tautuaina o matai, faatasi ma le fautuaga a tina i mataupu tau i loto i fale ole afio'aga. E pei ona faailoa mai le ata i luga ua mafai lava e le Pulega a Alii ma Faipule ona fausia tulafono faa-le-nuu e puipuia ai le lauina o le oneone. O ia vaega uma e faa-faigofieina ai le polokalame mo le faasaoina o le gataifale ona o le lagolagosua malosi mai le Pule mamalu a Alii ma Faipule aemaise o tagatanuu uma o le afio'aga.

### **3 Ituaiga Faigafaiva ta'atele.**

E tele ituaiga faigafaiva e mafai ona faatinoina i le aloalo o le afio'aga o Sataua. O nisi o nei ituaiga faigafaiva e i ai matatao, tosotoso, ma le faaaogaina o upega (e tele ina faatinoina e alii) mo le fofoga taumafa a le aiga pe faatau foi. O le aoina ma le eliina o figota i luga o le aau o le galuega patino lava lea a tina ma le fanau mo taumafa a le aiga. O le faatinoina o faigafaiva le talafeagai e i ai fanaia ma 'ava niukini ua matua faasaina lava i lalo o le pulega mamalu a Alii ma Faipule e tusa ai ma tulafono a le afioaga ua faamamaluina.

O le tele o i'a sa maua i aso ua mavae ua faigata ona maua i aso nei. O i'a o le aloalo e i ai lo, poge/alogo, fuafua/anae ma mataleele sa tele ma faigofie ona maua i le 30 tausaga talu ai. E oo foi i figota e i ai le faisua ma sea/loli//fugafuga/mama'o ua tele ni itula e faaaluina i fagotaga faatoa maua se meaai mo le aiga faatusatusa i le 30 tausaga ua mavae.

### **4 Tulafono faa-le-nuu e fesootai ma le siosiomaga o le gataifale o Sataua.**

O le tausaga **1958** e tusa ai ma faamatalaga tusitusia ma molimau a le afio'aga o Sataua sa faavae ai ona tulafono na fausia ma saunia e tuua ua fai i lagi le folauga, ma o loo faaauuina pea e oo mai i le taimi nei e faasaina ai faigafaiva le talafeagai ona faatinoina i o latou gataifale. Sa faailoa mai foi e le Pule mamalu a Alii ma Faipule le tusi ua maea tamauina ai nei tulafono uma a le afio'aga. E le gata i lea sa molimauina foi e nisi o sui ua maea faasalalauina tulafono a le afio'aga i le **Aso 10 Setema 1985** i luga ole alaleo (leitio) a Samoa. I le taimi nei ua matua faamallosia foi le tulafono e faasaina ai tagata mai isi afio'aga ona toe fagotaina gataifale o lenei afio'aga faatasi ma le lama moliuila. Peitai, o le auai o le afioaga i le polokalame lenei, e faamautuina ai le faamallosia o nei tulafono ma e mafai ai ona faasalaina i tulafono o faigafaiva a le Malo o Samoa se tasi na te le usitaia faasalaga faa-le-nuu ua tamauina i totonu o lenei tusi taijala poo le fuafuaga tatau mo le vaai lelei o i'a ma figota.

#### **Faaaliga faapitoa mo le taina o le PALOLO i tausaga taitasi i Sataua**

Ua malilie autasi le Pule mamalu a Alii ma Faipule o Sataua o le a tatalaina le ogasami faasaoina mo i'a ma figota, amu ma isi meaola i le taina o le palolo i tausaga taitasi. O lenei fuafuaga o le a i aao lava o Alii ma Faipule lona faasaina ma lona tatalaina ona e pei ona silafia na o le faalua ona ta le palolo i le tausaga.

### **5 Tapenaga o lenei Fuafuaga Tatau**

O lenei tapenaga sa saunia lava e le pule mamalu a Alii ma Faipule, ma tagatanuu o le afio'aga o Sataua e ala i faamatalaga sa aoina mai e alii ma tamaitai Ofisa i taimi o faatalatalanoaga faatasi ai ma ni fautuaga ma le lagolagosua sa tuuina atu e le Vaega o Faigafaiva ma tuufaatasia ai loa lenei Tusi taijala poo le Fuafuaga tatau mo le vaai lelei o i'a ma figota e lima taitaina ai le faagasologa o galuega aemaise o tulafono ua fausia e



pui puia ai le gataifale. O se ootoga leni i le tapenaga o leni Fuafuaga ina ua maea ni fonotaga sa faia ua taua i lalo.

### ***5.1 Feiloaiga muamua ma le uluai fono ma le afio'aga.***

I le amataga mai o le polokalame, sa faapea ona sailia e le Ofisa se finagalo o le Pule Mamalu a Alii ma Faipule e faatatau i le plokalamame mo le pui puia o le Gataifale. O le **Aso Faraile, 20 Oketopa, 2006** sa faia ai se feiloaiga muamua (fono) a le Ofisa ma le afio'aga e faamalamalama ai le polokalame mo le taliaina e le afio'aga. O le fono leni sa auai ai Alii ma Tamaitai Ofisa e taliaina aloaia ai se finagalo o le afio'aga i le polokalame. O le maea o leni feiloaiga muamua na taliaina lelei ai e le Afio'aga le Polokalame, ma filifili ai le Aso Tofi, 26 Oketopa 2006 mo faatalatalanoaga ma le Pule mamalu a Alii ma Faipule ma le Komiti a Tina ma Tamaitai.





## **5.2 Faatalatalanoaga ma le Pule Mamalu a Alii & Faipule ma le Komiti a Tina & Tamaitai.**

O le taua o lenei faatalatalanoaga ina ia vaevaeina le afio'aga i vaega e iai le pule mamalu a Alii ma Faipule, Komiti a Tina ma Tamaitai ma Aumaga. Peitai, na ole lua vaega na vaevaeina iai le afio'aga ona sa tuatuagia le Aumaga ma Taulele'a. O nei vaega e lua sa faatalatalanoaina e Alii ma Tamaitai Ofisa. O le autu tonu o nei faatalatalanoaga ina ia mafai e le afio'aga ona faailoa mai faafitauli o lo o alia'e i lo latou gataifale, ma sailia ai ni aafiaga ma ni mafuaaga o nei faafitauli, aemaise o ni fofo, faatinoga ma i latou e faatinoina nei fofo ua ta'ua. O lenei faatalatalanoaga sa faataunuuna lava i le **Aso Tofi 26 Oketopa 2006.**



**FAATALATALANOAGA MA LE PULE MAMALU  
A ALII MA FAIPULE & KOMITI A TINA**



### ***5.3 Komiti Faufautua mo le vaaia lelei o i'a ma figota (KFVL)***

O le Komiti leni e filifilia mai lava i vaega sa faatalatalanoaina. O le matafaioi a leni Komiti o le mataituina lea o fuafuaga faataatitia uma aemaise o galuega faatino i le ogasami faasao atoa ma le gataifale. E le gata i lea o taimi e asia ai e le Vaega o Faigafaiva mo le faatinoina o nisi o fuafuaga faataatitia e nafa tonu ma le ofisa, e mafai ai ona faafesootai se sui olenei Komiti pe a tuatuagia le Tofi Pulenuu ina ia silafia e le afio'aga galuega o loo faatinoina i le gataifale aemaise i le ogasami faasao. O le Komiti foi leni latou te mataituina ma faamalosia tulafono faatasi ma le lagolagosua a le Pule mamalu a Alii ma Faipule, tagatanuu uma ma le Vaega o Faigafaiva. Afai foi ae faia ni aoaoga mo le vaaia lelei o i'a ma figota aemaise lava i figota o loo faa-faatoagaina o le a faapena ona valaaulia mai e le Ofisa ni sui o le Komiti leni e auai ai, ona o i latou ia o loo nafa tonu ma nei matafaioi i le afio'aga.

## **6 Pasiaina o le Fuafuaga Tatau mo le Vaaia Lelei o I'a ma Figota.**

### ***6.1 Fuafuaga Tatau mo le Vaaia Lelei o i'a ma figota ma le tauaofiaga o le Fono Mulimuli.***

O le faagasologa atoa o leni fuafuaga ua tamauina lea i totonu o le Tusi Taiala poo le Fuafuaga Tatau mo le Vaaia Lelei o i'a ma figota. O leni fuafuaga o se maliliega i le va o le afio'aga ma le Malo e tauala mai le lagolagosua a le Vaega o Faigafaiva. O leni fuafuaga sa tuuina aloaia i le fono e sui o le KFVL a'o loo auai ai foi sui o le Pulega a le Vaega o Faigafaiva, e faailoa ai le taua o leni fono. O le fono foi lea e pasia aloaia ai e le Pule mamalu a Alii ma Faipule ma sui o le afio'aga o le a auai ai faatasi ma Alii ma Tamaitai Ofisa a le Vaega o Faigafaiva latou te molimauina leni faamoemoe. O le pasiaaina o leni Tusi Taiala poo le Fuafuaga Tatau mo le vaaia lelei o i'a ma figota e mafai ai e le Afio'aga ma le Vaega o Faigafaiva ona faatinoina galuega ma fuafuaga ua faataatitia.

## **7 Fuafuaga Faataatitia.**

O fuafuaga faataatitia o ni gaiouga ua faamoemoe e faaono foia ai faafitauli ua faaalua mai e vaega eseese o le Afio'aga. E lua (2) ituaiga fuafuaga faataatitia ua fuafuaina ma o le fuafuaga ua aupito sili ona taua o fuafuaga faataatitia lea ua faaagaga mo nuu poo afio'aga. O le isi vaega o fuafuaga faataatitia ua faamoemoe lea mo le Vaega o Faigafaiva ma o leni fuafuaga o le a tuuina atu ai fautuaga ma fesoasoani aua le tapenaina o le faamoemoe e faatino ai fuafuaga faataatitia mo le Vaega o Faigafaiva e ao ona faamaonia e le Pule Sili Lagolago a le Vaega o Faigafaiva a le Matagaluega o Faatoaga ma Faigafaiva.

O le tausaga e **1988** na pasia aloaia ai le **Tulafono Autu o Faigafaiva** o loo faasaina ai le faia o faigafaiva-le-talafeagai i ogasami o Samoa. Peitai o nei tulafono uma e lei lausilafia e le toatele o le mamalu o le atunuu. Ua avea ai leni polokalame mo le fuafua tatau ma le vaaia lelei o i'a ma figota poo le faasao o le gataifale ma auala e faalauiloa ai nei tulafono ma fuafuaga a le Malo o Samoa mo le puipuia o tamaoiaiga o le gataifale.

I le tausaga 1995 na pasia aloaia ai le **Tulafono Faatonutonu e faatapulaaina ai le laiti o i'a ma figota**. O lenei tulafono na pasia mo le faamoemoe e tuu avanoa ma fesoasoani i le faasaoina o i'a ma figota ua tauau ina mou atu. O le fua faatapulaaina o le laiti o i'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau e faatupulaia ai le faitau aofai o le tamaoaiga o le gataifale. O loo faapipiina atu i le pito i tua o le Tusi Taiala se Pepa o Faamatalaga (6) mo le faamalamalamaina o lenei tulafono.

O **Tulafono Laiti** a afio'aga ma alalafaga ua amanaiaina e le Faamasinoga. O se tasi lea o auala ua tuu sao ai e le Malo le malosiaga i afio'aga e mafai ai ona latou molia i le tulafono soo se tagata e le usitaia tulafono ua aiaia i totonu o le Tusi Taiala poo le fuafuaga tatau mo le vaaia lelei o i'a ma figota a le afio'aga. O tulafono faa-le-nuu ua pasia i le Fono mamalu a Alii ma Faipule faatasi ma nisi tulafono sa fausiaina i faatalatalanoaga mo le puipuia ole gataifale o le a tapenaina uma ma tuuina atu mo le pasiaina aloaia i lalo o **Tulafono Laiti o Faigafaiva** a le Malo o Samoa. O le itu lelei o nei tulafono o le mafai lea ona aiaina e le Pule Mamalu a Alii ma Faipule o tagata uma aemaise i afioaga tuaoi, e puipui mai ai le fagotaina o le gataifale. O nei tulafono e laugatasia ai ma tagatanuu i faasalaga. O tulafono uma nei oloo tamauina i lalo o le vaega o Tulafono ma Faasalaga o le Tusi Taiala aua le fuafua tatau ma le vaaia lelei o le gataifale i tulaga o ona tamaoaiga ma lona siosiomaga mo se lumanai manuia.

I taimi o faatalatalanoaga i vaega taitasi e tele ni mafuaaga sa fa'ailoa mai ae auga lava i le faafitauli ogaoga o le **“faaitiitia lea o i'a ma figota”** i le aloalo ma aau o le Afio'aga o Sataua. O mafuaaga ma o latou aafiaga i le siosiomaga o le gataifale sa faapea ona iloiloaina ma sailia ai ma le tali o le faafitauli ma fofo e foi'a ai. E le gata i lea sa faailoa mai ai foi ma i latou e faatinoina nei galuega.

### ***7.1 “Faamalosi Tulafono faale nuu e faasaina ai faigafaiva le talafeagai e pei o fanai'a, ava niu kini ma vailaau oona”.***

#### **Otootoga**

Na faaalua e vaega taitasi i taimi o faatalatalanoaga o loo fa'auauina pea le faaaogaina e faifaiva o fanai'a, ava niukini ma vailaau o'ona i fagotaga. O nei faigafaiva le talafeagai ua mautinoa lo latou tulaga ogaoga i le faatamaiaina o le siosiomaga o le gataifale e pei o i'a laiti aemaise o nofoaga taua mo meaola o le sami e iai amu. O le faaleagaina o le gataifale mai nei auala faafaigafaiva e umi ma tele se taimi e toe faafoi ai i le lelei sa iai.

#### **Fuafuaga faataatitia a le Afio'aga.**

Talu ai ona o le tulaga pagatia ua iai le Gataifale o lenei Afio'aga o Sataua o lea ua a'e ai se finagalo autasi i le Komiti ua filifilia ina ia matua faamalosi loa tulafono a le Afio'aga e faasaina ai faigafaiva le talafeagai e pei o fanai'a, ava niu kini ma vailaau oona. O le puipuiga ma le faamamaluina o nei tulafono o le a i aao lava o le pule mamalu a Alii ma Faipule faatasi ai ma le lagolagosua a tagata nuu o le afio'aga.

#### **Fautuaga:**

Ia toe faamalosi ma faamamaluina tulafono ua taua i lalo a le Afio'aga mo le faasaina o faigafaiva le talafeagai.



**Tulafono:**

*Mo le mamalu ole atunuu faatasi ai ma tagata nuu o Sataua– Ua matua faasaina lava faigafaiva le talafeagai e pei o fanaia, ava niu kini, ma vailaau oona ona toe faatinoina i gataifale poo le ogasami faasao a lenei afio’aga. O le puipuiga ma le faamamaluina o nei tulafono o le a i aao o le pule mamalu a Alii ma Faipule faatasi ai ma le lagolagosua a tagata o le Afio’aga.*

**Faasalaga:**

O le le usitaia o lenei tulafono o le a molia sa’o i le **Tulafono Autu o Faigafaiva 1988** a le Malo o Samoa.

**Fuafuaga faataatitia a le Vaega o Faigafaiva.**

O le a fesoasoani le Vaega o Faigafaiva mo le faatinoina o fuafuaga faataatitia a le Afio’aga e ala atu i lana polokalame fesoasoani i aoaoga tau faigafaiva. E le gata i lea o le fesoasoani e faamalositia le tulafono e faasaina ai ona fagotaga e faaogaina ai faigafaiva le talafeagai e pei ona taua i luga.

**7.2 Ia faasaina faigafaiva mai isi Afio’aga.****Otootoga**

O fagotaga mai isi nuu e faaogaina ai faigafaiva le talafeagai, e iai ava niu kini, fanaia, vailaau oona, fa’amo’a ma tu’iga, ua mautinoa le matua faaleagaina ai o le gataifale. E le gata i lea, o le faaopoopoina lea o le numera o tautai latou te fagotaina gataifale o le afio’aga ma oo ai i se tulaga e faaitiitia ai i’a ma figota maua.

**Fuafuaga faataatitia a le Afio’aga**

Ua faaalua mai e le komiti (KFVL) le tatau ona faia o se tulafono e faasa ai faigafaiva e pei o le faaogaina o faigafaiva le talafeagai. O le autu moni o lenei tulafono ona o nisi o tagata mai isi afio’aga o loo latou faatinoina faigafaiva i gataifale ma faatamaia ai. O lea ua faia ai se tulafono ma ona aiaiga mo le mamalu o le atunuu lautele e le o ni tagatanuu o Sataua.

**Tulafono:**

*“Ua matua faasaina lava tagata mai isi afioaga ona faatinoina soo se ituaiga faigafaiva i le gataifale o Sataua”*

**Faasalaga:**

O le le usitaia o lenei tulafono o le a molia sa’o i Tulafono Laiti o Faigafaiva auala atu i le Vaega o Faigafaiva.

**Fuafuaga faataatitia a le Vaega o Faigafaiva**

O le a fesoasoani mai le Ofisa mo le faamalositia ma le faamautuina o lenei tulafono.

**7.3 Ia faasaina ona toe fagotaina mai i’a ma figota laiti.****Otootoga**

O le fuafua tatau o le fagotaina mai o i’a ma figota o se itu lelei tele ma talafeagai lea mo le faasaina ma le toe faatupulaia o meaola o le gataifale. O lenei fuafuaga o le a mafai ona maua ai le avanoa e i’a ma figota laiti e tutupu ma fanafanau ai, i le uluai taimi ao lei aveeseina pe fagotaina mai foi. Afai e fagotaina mai se i’a po’o se figota ae lei o’o i le

lapopo'a (matua) e fanafanau ai, o lona uiga ua leai sona sao mo le isi augatupulaga e soso'o ai. Afai la o le a faaauau ai pea lea tulaga, o lona uiga, o le a saga faaitiitia pea le faitauaofai o i'a ma figota ma faasolo lava ina mou malie ese atu.

#### **Fuafuaga faataatitia a le Afio'aga**

Ua faaalua e le afio'aga lo latou lagolagoina o le Tulafono o Faigafaiva ua pasiaina nei o loo aiaia ai fua faatapulaa o le laiti o i'a ma figota e tatau ona fagotaina. Na taua foi o le faamalasia o lenei tulafono o le a iai pea lea i le pule mamalu a Alii ma Faipule faapea le Afioaga i le Pulenuu ma le Komiti. Ua lagolagoina foi e le afio'aga le pepa o faamatalaga o loo faaalua ai fua faatapulaa o le laiti o ia ma figota e fai ma taiala.

#### **Tulafono:**

*“Ua matua faasaina ona toe fagotaina i'a ma figota laiti mai le gataifale o Sataua e pei ona fa'aalia i le Tulafono fa'atonutonu o Faigafaiva a le Malo o Samoa”*

#### **Faasalaga:**

Soo se tasi e le usitaia lenei tulafono o le a molia sa'o i le Tulafono faatonutonu o Faigafaiva a le Malo o Samoa.

#### **Fuafuaga a le Ofisa o Faigafaiva.**

O le a fesoasoani le Ofisa mo le tapenaina o Tulafono o Faigafaiva mo fua faatapulaa o i'a ma figota aemaise pepa o faamatalaga e faamalamalama ai le puipuiga o le fagotaina o i'a ma figota laiti.

### **7.4 Ia faasaina lama moliuila**

#### **Otootoga**

Sa faaalua e le afio'aga ua maea faasalalauina le tulafono e faasa ai faigafaiva e faaaogaina ai moliuila i gataifale o le afio'aga aemaise lava i faifaiva mai isi afio'aga. Ua mautinoa i suesuega sa faia i le gataifale, ole faaaogaina o moliuila e tele se aafiaga o i'a ma figota e tulai mai ai. O le faaaogaina o moliuila o se auala e faigofie ona maua ai i'a ma figota i se taimi vave aua e mafai e le susulu o le moliuila ona o'o i vaega o le alititai ma va o amu o loo fai ma nofoaga o i'a. O se tasi lena o mafuaaga ole tulai mai o le faafitauli lenei o le fa'aitiitia o i'a ma figota i gataifale o Samoa.

#### **Fuafuaga faataatitia a le afioaga**

Ua fautuaina e Alii ma Faipule le taofia ma faasaina ona toe faaaogaina o moliuila i faigafaiva e pei o lama. Ua autasi foi le afioaga o le a tamauina le tulafono ua leva ona tausia i totonu o le tusi taiala poo le fuafuaga tatau mo le vaai lelei o i'a ma figota ina ia faamalasia atili ai.

#### **Tulafono:**

*“Ua matua faasaina ona toe iloa se lama moliuila i le gataifale ma le ogasami faasao o lenei nuu o Sataua”*

#### **Faasalaga:**

O le solia o lenei tulafono ole a faasalaina e le Komiti (KFVL) i le faasalaga e \$50, a le usitaia o le a faasalaina i le 10 aumatua i luma o le nuu.

### **Fuafuaga faataatitia a le afioaga**

O le a fesoasoani mai le ofisa i faamatalaga e faamalamalama ai lenei mataupu mo le silafia o le afioaga.

### **7.5 Ia faasaina ona toe Lafoa'i lapisi e pei o uamea, atigi apa pepa iila ma isi ituaiga i le sami ma le matafaga.**

#### **Otootoga**

O lapisi lafoai i le sami ma matafaga e avea ma ala e faamanualia ai aao o le aufaifaiva. E le gata i lea o le faaleagaina ai o le siosiomaga o le gataifale ma faatamaia ai nofoaga mo meaola o le sami. E le talafeagai foi i le silasila a le afio'aga poo tagata tafafao mai se matafaga e lafoai ai nei ituaiga o lapisi.

### **Fuafuaga faataatitia a le Afio'aga**

O le a faamalositia e le Afio'aga fuafuaga ma aiaiga e faasaina ai ona toe lafoai lapisi e pei ona taua i luga i le matafaga ma le sami. Ua saunia foi e le Afio'aga fata lapisi ma lagolagoina polokalame a le malo o loo aoina ai lapisi.

#### **Tulafono:**

*“Ua matua faasaina ona toe lafoai lapisi o soo se ituaiga (u'amea, atigipepa iila, atigiapa ma isi) i le matafaga ma le gataifale o Sataua.*

#### **Faasalaga:**

O le le usitaia o lenei tulafono o le a faasalaina e le Komiti (KFVL) i le \$50.00, a le faia o le a faasalaina i luma o le nuu i le 10 aumatua.

### **Fuafuaga faataatitia a le Ofisa o Faigafaiva**

O faamatalaga eseese e faatatau i aafiaga o le siosiomaga o le gataifale ma ona tamaoiga o le a fesoasoani atu ai le Ofisa o Faigafaiva e aotauina ai le afio'aga i le taua o le teu maluina o lapisi ma otaota i nofoaga talafeagai. O le a faia foi se polokalame i le televise e falauiloa atili ai le taua o le siosiomaga mama.

### **7.6 Ogasami Faasaoina**

#### **Otootoga**

Sa faaaliga e le Afio'aga o le vave faatupulaia o le tamaoiga o le avea lea ose vaega o le gataifale ma ogasami faasao, e vave ai ona toe faatupulaia le faitauaofai o i'a ma figota. O lenei ogasami faasao o le a faasaoina ai amu, 'aau faapea foi i'a ma figota ina ia mafai ona maua e nei meaola le avanoa e tautuufua ma fanafanau ai. O le autu taua lava o le a avea lenei faasao ma punaaga o i'a ma figota e mafai ai ona fa'aleleia nisi o vaega o le gataifale ua afaina. O le a fanafanau ma tautu'ufua i'a ma figota o lo o aumau i le ogasami fa'asao ma tafea atu o latou fua fanau ma fa'atupuina ai, nisi meaola fou i nofoaga ua le maua ai ni i'a ma figota. O le a le pine ona manuia ai i tatou ae fa'apea foi tupulaga o le lumana'i.



### **Fuafuaga faataatitia a le Afio'aga**

O le afio'aga o le a latou filifilia se vaega o le gataifale e fa'atinoina ai le vaega fa'asaoina. O le a latou fausiaina foi tulafono e fa'asaina ai ni faigafaiva ona fa'atinoina i lea vaega. O le matafaioi a le afioaga le faia o ni faailoilo e faailoa atu ai i le atunuu lautele aemaise i afioaga tuaoi lenei nofoaga. O le afio'aga foi latou te mata'ituina ma faamallosia tulafono.

### **Tulafono:**

*“Ua matua faasaina soo se ituaiga faigafaiva ona faatino i totonu o le Ogasami faasaoina a le afioaga o Sataua”*

### **Faasalaga:**

O le le usitaia o lenei tulafono o le a faasalaina e le Komiti (KFVL) i le \$50.00 a le usitaia lava o le a molia sa'o loa i Tulafono Laiti o Faigafaiva a le Malo o Samoa e auala atu i le Vaega o Faigafaiva.

### **Fuafuaga faataatitia a le Vaega o Faigafaiva:**

O le a fesoasoani atu le Ofisa i le faatinoina o le iloiloga o le tulaga talafeagai o le gataifale mo se nofoaga faasaoina. E le gata i lea a o le tu'uina atu o fautuaga ma faamatalaga mo le tausiga, pulea ma le va'aia o le nofoaga faasaoina o le gataifale o le afio'aga. E fesoasoani atu foi le Ofisa i le tapenaina o tulafono e puipuia ai le nofoaga faasaoina.

## ***7.7 Ia iloilo ina tulaga talafeagai o le faasaoina o se vaega o le gataifale ole afio'aga***

### **Otootoga**

O se vaega o le gataifale ua faasaoina e tatau ona le toe aafia ai ni faigafaiva. O le avea o se vaega o le gataifale ma nofoaga faasao, e mafai ona malu puipuia ai le siosiomaga o le gataifale ma ona tamaoiga i figota ma i'a aemaise o 'amu. O lenei nofoaga faasao o le a faasaoina ai amu, 'aau, figota faapea foi ma i'a ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea lenei faasao ma punaaga o i'a ma figota e mafai ai ona toe faaleleia nisi vaega o le gataifale ua afaina. E le gata i lea o le a fanafanau ma tautuufua i'a ma figota o loo aumau i le nofoaga faasaoina ma tafea atu o latou fua fanau ma faatupuina ai nisi meaola fou i nofoaga ua le maua ai nei i'a ma figota. O le a le pine ona manuia ai i tatou ae faapea foi tupulaga o le lumanai.

### **Fuafuaga faatatitia ale Afio'aga**

O le afio'aga e ao ona:

- Galulue faatasi ma lagolagosua i le afaigaluega a le Vaega o Faigafaiva, i le faatinoina o le iloiloga o le tulaga talafeagai o se vaega o lona gataifale, e avea ma nofoaga faasaoina.
- Talanoaina ma auiliiliina le lipoti ma ia faia se faaiuga i le faavaeina o le nofoaga faasaoina.

- Saunia faailoilo e pei o laau, pole poo nisi lava faiga talafeagai mo le faailogaina o le vaega ua faamautuina ma pasiaina.

Afai ae finagalo le fono i se tasi, poo fuafuaga uma ua taua:

- Ia faatinoina loa fuafuaga mo le faavaeina o le nofoaga faasao e pei o le mataituina, tausiga ma le vaaia lelei o se vaega ua atofaina.

### **Fuafuaga Faataatitia a le Vaega o Faigafaiva**

O le Vaega o Faigafaiva o le a:

- Faatinoina le suesueina o se vaega o le gataifale e avea ma nofoaga faasaoina. O lea fuafuaga e faamoemoe i se vaega e tusi aao iai le afioaga, ae a le talafeagai lea vaega ona fautuaina lea e alii ma tamaitai ofisa se vaega talafeagai mo lea faamoemoe.
- Saunia le lipoti mo le tuuina aloaia atu i le Komiti mo le Vaaia lelei o i'a ma figota (KFVL) ma le Fono a le afio'aga.

Afai ae finagalo le fono i se tasi, poo fuafuaga uma ua taua

- Pe a tusa ai, o le a tuuina atu ni fautuaga ma ni faamatalaga mo le tausiga, pulea ma le vaaia o le nofoaga faasao o le gataifale o le afio'aga.

## ***7.8 Ia iloilo ina tulaga talafeagai o le Gataifale mo le Tufaina atu ma le Faatoagaina o figota ma i'a.***

### **Otootoga**

O le tufaina atu ua faatatau lea i le talafeagai o vaega moomia mo le faaolaina o i'a ma figota.

O nisi nei o atinae mo le faatupuina o figota ma i'a aua le fofoga taumafa mo le afio'aga. O nei auala faa-atinae e moomia ai lava le galulue filiga ma le faamaoni o le afio'aga ina ia ausia se taunuuga lelei.

### **Faamatalaga faaopo'opo\_ - Tufaina o figota/i'a**

O le tufaina atu ua faatatauina lea i le aumaia o ni figota/i'a mai se isi atunuu e faaolaina i se ogasami/vai ua talafeagai lelei. O le tufaina o le figota o le aliao i le tele o atunuu o le Pasefika ua mautinoa ai le tele o ni faamanuiaga na mafai ona seleseleina e nei atunuu.

I Fiti ua tele ina faaaogaina ma toomaga iai tagata i le aano o le aliao e avea ma mea taumafa. O lona atigi na mafai ona faatauina atu e gaosi ai faamau o ofu i fale gaosi oloa. I le Atu Kuki e tusa ma le 280 aliao na tufaina atu iai ma na mafai ona maua mai ai se aofaiga e tusa ma le 200 tone o atigi aliao i le tausaga na faatauina i fale gaosi faamau.

I le 1990 na tufaina atu ai i sami o le motu o Namu'a i Aleipata le 40 o aliao ma e le o mai iloa tonu le tulaga ua oo iai nei aliao. I le taimi nei o loo iai taumafaiga a le Vaega o Faigafaiva i le faafofoaina o faisua, tapumiti (tuitui) ma aliao lapo'a e ese mai le aliao Samoa, mo le faa-faatoagaina i gataifale o le atunuu. O nei figota ua mautinoa lo latou faaitiitia talu ai o le soona fagotaina e le gata i lea o faigafaiva le talafeagai ma mala faa-le-natura ua faatamaia ai o latou nofoaga. O le faamoemoe la o lena taumafaiga o le faa-faatoagaina lea o nei figota i vaega o le gataifale ina ia toe faatupulaia ai.

## **Fuafuaga Faataatitia a le Afio'aga**

E ao i le afio'aga ona:

- Galulue faatasi ma le Vaega o Faigafaiva i le faatinoina o le iloiloga pe talafeagai ma lelei le gataifale ma le vai (pe a iai se vai o le afio'aga) i le tufaina atu ma le faafaatoagaina o figota/i'a
- Auiliiliina o le lipoti i suesuega o le talafeagai o le gataifale ma le vai, ma ia faia se faaiuga i le faatinoina o nei atinae i totonu o Sataua
- Galulue faatasi mo le puipua o nei atinae ma le va'aia o tagata o lo'o latou faatamaia ma solia tulafono e faatatau i nei atina'e.

## **Fuafuaga Faataatitia a le Ofisa o Faigafaiva:**

O le a faatinoina ni su'esu'ega i le gataifale ma le vai o le afio'aga ina ia faamaonia le talafeagai mo le faaolaina ai o figota/i'a. O le a mafai ona tuuina atu ni figota/i'a pe afai o le a faamaonia le talafeagai o nei nofoaga mo ia atina'e.

## **Pe a faataunuaina lenei fuafuaga, o le a:**

- Fesoasoani mai le Ofisa e ala lea i le va'aia ma le mata'ituina o le sologa lelei o le tuputupu a'e o figota/i'a ua atina'eina.
- Saunia ni aoaoga mo le faamalamalamaina o olaga faanatura ma le tausiga o nei figota/i'a.

## ***7.9 Ia fa'aaogaina le Mana o Talosaga!***

### **Otootoga**

O talosaga ma talitonuga tuufaatasi faa-le-lotu, o se tasi lea o faamoemoea ua talitonuina lona taua aua le puipua ma le faasaogalemuina o le gataifale ma ona tamaoaiga aemaise o lona siosiomaga. Ua mae'a foi ona faia se fuafuaga a le Malo i le faia o le vaiaso mo tatalo ma anapogi e talosia ai lo tatou atunuu ina ia mamao ni mala faa-le-natura ona aafia ai tatou ma lo tatou siosiomaga. Peitai o se taunuuga lelei o nei fuafuaga e faamoemoe lea ia i tatou mo le faamamaluina o lenei vaiaso e tasi e tuu atoa ai o tatou agaga ma loto e talosia ai o tatou laufanua, gataifale ma lo tatou siosiomaga atoa ina ia lauolaola ma manuia mo i tatou nei aemaise o fanau o le lumanai.

### **Fuafuaga Faataatitia a le Afio'aga**

O le sao taua o le au-failotu, o le unaia lea ma faamalosiua i tagatanuu ina ia latou faatauaina le puipua ma le faasaoina o le gataifale ma ona tamaoaiga.

O le tuufaatasia o finagalo o tagata ina ia galulue faatasi e foia ai foi faafitauli o loo alia'e mai i le gataifale. Ua lagolagoina foi e le Komiti lenei fautuaga ma fautuaina ai le galulue faatasi o le aufailotu ma le mamalu o le afio'aga.



### **Fuafuaga faataatitia a le Ofisa o faigafaiva**

O le a mafai ona tuuina atu ni fesoasoani mai le Ofisa mo le mamalu o le au-fai lotu e ala i pepa o Faamatalaga ma Tautalaga ina ia fesoasoani i le tapenaina o a latou lauga ma aoaoga mo le puipuia ma le faasaoina o le siosiomaga o le gataifale ma ona tamaoaiga.

#### **7.10 Talosaga:**

O nei talosaga sa mafai ona tuuina mai e sui ole afio'aga sa auai i fonotaga ma le Vaega o Faigafaiva i taimi o faatalatalanoaga i vaega. O talosaga uma foi la ua tuuina mai sa faamautuina e le Komiti (KFVL) i le latou fonotaga ma le Ofisa. O le tuuina atu foi o figota ma i'a ua faatalosagaina e fuafua lelei i le talafeagai o le gataifale mo i'a ma figota. E faaalua le talafeagai o le gataifale i se lipoti e tuuina mai e le vaega su'esu'e o loo nafa ma galuega nei a le Vaega o Faigafaiva. O iina e silafia ai e le afio'aga le tuuina atu o meaola o loo faa-talosagaina. O talosaga uma sa tuuina mai o loo faailoa atu i lalo;

- (a). Faisua
- (e). Ogasami faasao mo i'a ma figota.
- (i). Aliao.
- (o) tapumiti ma isi figota
- (u) totoina o le amu

#### **7.11 Maliliega:**

Ua i ai le maliliega o le a galulue so'oso'o tauau uma vaega i le puipuiga o le siosiomaga o le gataifale mo le manuia o tagatanuu o le afio'aga aemaise o tupulaga o le lumanai. O lea manuia e mafai ona maua pe a faatinoina uma fuafuaga faataatitia ua tamauina i le Tusi Taiala poo le Fuafuaga Tatau mo le Pulea ma le Vaaia lelei o i'a ma figota o le afio'aga.

#### **7.12 Toe iloiloaina o lenei Fuafuaga Tatau**

##### **Otootoga**

O le toe iloiloaina o lenei Tusi Taiala poo le Fuafuaga Tatau mo le vaaia lelei o i'a ma figota o le afio'aga e sailia ai le agai i luma o le polokalame i totonu o nuu ma afio'aga, aemaise se auiliiliga maumaututu i le tulai mai o galuega fai a le afio'aga ma le Vaega o Faigafaiva i le faataunuaina o fuafuaga faataatitia e pei ona taua i luga. O lenei foi iloiloiga e lipotia ai le alualu lelei ma ni faaletonu i totonu o le Polokalame talu ona faavaeina i totonu o le afio'aga. E le gata i lea o ni vaega e fia faia iai ni suiga fou e pei o le toe teuteuina o tulafono ma le faamautuina o matafaioi a itu uma o le polokalame.

### **Fuafuaga faataatitia a le Afio'aga ma le Ofisa o Faigafaiva**

Ua i ai le maliliega a le Komiti (KFVL) a le afio'aga ma le Vaega o Faigafaiva o le a toe auiliiliina lenei Tusi Taiala poo le Fuafuaga Tatau pe a maea le ono (6) masina talu ona pasia lenei tusi i le Fono Tele. O le a feutaga'i lava le Vaega o Faigafaiva ma le Tofi o le afio'aga ma le Komiti i se aso o le a atofaina pe a atoa le ono (6) masina.

### ***7.13 Upu Mulimuli:***

O le auai o le afio'aga o Sataua i le Polokalame mo le Pulea ma le Vaaia Lelei o I'a ma Figota ua mautinoa le manuia ole afio'aga i ni tausaga o i luma. O le manuia ma le alualu i luma o lenei polokalame e faalagolago tele i le galulue faatasi o le afio'aga; i le Pule Mamalu a Alii ma Faipule, Komiti a Tina, Aumaga aemaise o le Malo e tau ala mai le Vaega o Faigafaiva i le faatinoina o fuafuaga faataatitia ua mae'a soalaupule i le tele o fonotaga ma faatalatalanoaga sa faia.

O lenei polokalame o se galuega e umi se taimi e faaatali ai ni tali faaaliali ma sona lelei, o lea e taua ai mo le silafia e tagatanuu o le afio'aga. O i latou o le a talisapaia ma 'ae'ae i nei manuia o tupulaga o le lumanai o le afio'aga. O lea ua a'e ai se tofa i le Afio'aga e faia se polokalame fa'apenei a le Malo e fesoasoani ai e toe tapu'e mai le sosia o le tamaoaiga o le gataifale o le afio'aga ua tauau ina mou atu.

**Faamatalaga e uiga i le afio'aga.**

## **8 Faamatalaga 1 - Faamatalaga e uiga i le afio'aga o SATAUA.**

### **1. Faitau aofai o tagata.**

Aofaiga o matai, faletua, tausī, aualuma, aumaga, alo ma fanau --- 994

### **2. Ituaiga o Ekalesia**

- ✓ EFKS
- ✓ Metotisi
- ✓ Katoliko

### **3. Aoga**

- ✓ Tulaga lua

### **4. Siosiomaga o le gataifale.**

Umi o le aau	500 mita
Mamao o le aau ma le matafaga	50 mita
Loloto o le vaega aupito sili ona loloto o le aloalo pe a pe le tai	3 futu
Loloto o le vaega aupito sili ona loloto o le aloalo pe a sua le tai	5-6 futu
Papa'u o le vaega aupito sili ona papa'u o le aloalo pe a pe le tai	2 futu
Papa'u o le vaega aupito sili ona papa'u o le aloalo pe a sua le tai	3 futu

### **5. Nisi Faamatalaga**

- Toatele o le afio'aga ua aumau i atunu'u mamao
- Maopopo faiganu'u i Alii ma Faipule, Aumaga ma le Komiti a Tina ma Tamaita'i



## 9 Faamatalaga 2: Ituaiga Faigafaiva e fa'atinoina i aso uma

Ituaiga	Taimi fa'aalu (tasi/ova ma le tasi le aso i le vaiaso)	O ai e masani ona fa'atinoina nei faigafaiva			O le fa'aaogaina o i'a/figota maua		
		Ali'i	Tama'ita'i	Tamaiti	'Aiga	Fa'atau	'Aiga/Fa'atau
Maulu & matatao	3 itula	√			√		
Ofe	4 itula	√			√		
Upega	3 itula	√					√
Aoina o figota	3 itula	√	√		√		
<b>Nisi Fa'amatalaga</b> <ul style="list-style-type: none"> <li>❖ Faigafaiva ua fa'asaina – 'ava niukini, fanai'a, tu'iga/fa'amo'a, tane mauulu</li> <li>❖ Fa'asaina foi tagata mai isi afio'aga ona fagotaina gataifale o Sataua se'i vagana ua feutaga'i ma le Komiti (KFVL).</li> </ul>							

## 10 Fa'amatalaga 3: I'a ma Figota

Ituaiga i'a	Ituaiga faigafaiva	Taimi fa'aalu i fagotaga	
		Taimi nei	30 tausaga
Lo	Matatao	3-4 itula	2 itula
Pone	Matatao/lama	3-4 itula	2 itula
Mata'eleele	Upega/lama/matau	3 itula	1 itula
Ta'uleia	Lama/matatao	4 itula	2 itula
Malau	Uaua/lama/upega	3 itula	1.5 itula
Lalafi	Lama/matau	3 itula	2 itula
Fugausi	Lama	2 itula	1 itula
<b>Ituaiga figota</b>			
Alili lapo'a	Aoina	4-5 itula	3 itula
Faisua	Fasi faisua	5 itula	3 itula
sea	Tui sea	5 itula	2 itula
Tuitui	Aoina	4 itula	2 itula
vaga	aoina	4 itula	2 itula

Nisi fa'amatalaga:

❖ Nofoaga fa'asao: e le'i amataina

## **11 Fa'amatalaga 4: Tulafono a le Afio'aga i le puipuiga o le gataifale**

O tulafono ua taua i lalo ua mata'ituina e le afio'aga mo le puipuiga o tamaoaiga ma le siosiomaga o le gataifale.

1. Ituaiga faigafaiva ua fa'asa ona toe fa'atinoina i gataifale o Sataua
  - ❖ 'ava niukini
  - ❖ Fanai'a
  - ❖ Lama moliuila
  - ❖ Vailaau ona
2. O tagata faifaiva mai isi afio'aga ua matua faasaina lava ona toe faatinoina se faigafaiva i gataifale ma le ogasami faasaoina o le afio'aga o Sataua.

## **12 Fa'amatalaga 5: Fa'amatalaga ma fa'amaumauga sa aoina i taimi o fa'atalatalanoaga i vaega.**

Ta'ita'i fa'atalatalanoaga: Maatui/Sapeti/Aifiti  
Fesoasoani ma fa'amaumau faamatalaga: Malaeulu/Talavou/Totive/Sefulu  
Aso na faia ai: 26/10/2006.

**AUTU: "PUIPUIGA O LE SI'OSI'OMAGA O LE GATAIFALE"**

**‘Aafiaga:**

- Faaitiitia taumafa sami
- Tele le taimi fa’aalu i fagotaga
- Aafia le soifua maloloina
- Faaitiitia tupe maua mai tau’i’a faatau atu

**Faafitauli:** Faaitiitia i’a ma figota laiti i gataifale o Sataua

**Mafuaaga:**

- Tau leai ni amu ola
- Mala faa-natura ( matagi/afa/lologa/galu ma isi)
- Faigafaiva le talafeagai (fanai’a/ava niukini)
- Faiva e pei o fa’amo’a ma upega tu’iga

**TALI FA’AFITAU LI:** Fa’ateleina i’a ma figota i le gataifale o Sataua

**Fofu o Mafuaaga:**

- Faateleina o amu ola/faasao le amu
- Mana o talosaga e talosia ai le siosiomaga o le gataifale
- Faasa faigafaiva le talafeagai (fanai’a/ava niukini)
- Faasa fa’amo’a ma tu’iga
- Aoina alamea

**Fa’atinoga: (E faapefea ona fa’atino?)**

- Fa’asao amu e ala i le faia o se Ogasami Fa’asao
- Faamamaluina le vaiaso o tatalo ma anapogi a le Malo
- Faia tulafono e fa’asaina ai faigafaiva le talafeagai
- Faia ni polokalame e unaia ma faamalosia ai faiva i tuaau
- Faia ni fautuaga ina ia aoina mai i uta alamea pe a vaaia i taimi o fagotaga

**O ai e faatinoina:**

- Pulega a Alii ma Faipule
- Faletua ma Tausi
- Aumaga ma tagatanu’u uma
- Vaega o Faigafaiva (sui o le Malo)

**Talosaga a le afio’aga:**

- Nofoaga fa’asao ina mo i’a ma figota
- Fa’a-fa’atoagaina o le faisua, ‘aliao ma isi figota
- Fa’alateleina le tomai i nisi o agavaa faa-faifaiva

**13 Fa’amatalaga 6: Sui o le afio’aga sa auai i faatalatalanoaga**

**Matai:** Niuava Tovia (Pulenuu)

Lefua Semi

Lefua Roketi

Leilua Lui

Fiso Niko

Lefua Vaalele

Laufale Solofa

Lefua Lefulefu

Lefua Faaoso	Uifagasa Vaovale
Taliao Maletino	Tiamalo Ioane
Tuisataua Iafeta	Leilua Pati
Galuo Samania	Fata Atonio
Lefua Poasa	Leilua Tavita
Lefua Kome	Tuaila Mareko

***Komiti a Tina:***

Laina Lefua Vaalele	Fuapauna Leilua Lui
Erina Lafai	Masi Tuisataua I
Faauma Mataena L	Naomi Fesili Kose
Fesiitaina Fagalilo F	Tiresa Tuasivi
Faitele Mama V	Lomaga Niuava Tovia
Sama Leone	Faalaa Laufale
Fiapito Galuo Samania	Aniva Lisati
Melania Talita	

***Aumaga:***

Milo Faasoo	Amosa Sefulu
Asuelu Vaalele	

**Suafo o le Komiti mo le Vaaia lelei o i'a ma figota (KFVL)**

***Matai:***

Niuava Tovia (Pulenuu)	Lefua Roketi
Leilua Tavita	Lefua Kome
Tuaila Mareko	

***Komiti a Tina:***

Faauma Mataena	Melania Talita
Fiapito Lautala	

***Aumaga:***

Milo Faasoo	Amosa Sefulu
Asuelu Lefua Vaalele	

**Sui o le Vaega o Faigafaiva a le Matagaluega o Faatoaga ma Faigafaiva a le Malo Samoa**

Autalavou Taua (Alii Ofisa Sinia)  
 Seuamuli Totive Aloaina (Alii Ofisa Sinia)  
 Ulusapeti Tiitii (Tamaitai Ofisa)  
 Malaelulu Mamoe Gie (Alii Ofisa)  
 Ma' atui Filifili (Alii Ofisa Lagolago)  
 Solomona Tufuga (Alii Ofisa)  
 Aifiti Viane (Tamaitai Ofisa lagolago)  
 Sefulu Leleimalefaga (Alii Ofisa lagolago)